



COSMOGRA-
PHIE DE
LEVANT,

Par F. André Thevet
D'ANGOULESME.

*Revue & augmentee de plu-
sieurs figures.*

Le Prieur

A LION,
PAR IAN DE TOURNES
ET GUIL. GAZEAU.

M. D. LVI.

Avec Privilège du Roy.

d'une haute tour, qu'ils ont en lieu de clocher, on se pourmenans par un deambuloire, estoupanz leurs oreilles de leurs doigts, crient à voix desployee & de toute leur force, choses non vulgaires, & qui ne doiuent (à leur dire) aucunement estre prononcees des Cretiens. Toutefois ie vous diray ce qu'un Turq, à moy familier, m'en ha doctiné par escrit. Premièrement ils crient de toute leur puissance voire de sorte que les chiens s'en prennent à hurler. *Allah heber, Allah heber*, qui vaut autāt à dire, que Dieu est grand, Dieu est grand. Derechef ils disent. *Lailach illalach*, Dieu est un Dieu grād. *Mehemmet Resulallah, Mehemmet Resulallah*, Mehemet est son enuoyé & son profete. *ya len cela*, venez à l'oraïson adorer Dieu. Et repliquēt quatre fois ces paroles. Le peuple oyant ces cris se prepare pour aller à leurs Mosques, dens lesquelles (apres s'estre lauez) ils entrent deschaus (ayans à l'entree oté leurs souliers) & là sont beaux tapis Turquins preparez, sur lesquels ils s'assient les iambes en croix à la maniere des Couturiers, puis crient à haute voix les paroles que dessus, Dieu est grand, & son profete : Dieu est grand, & son profete : & resumeront bien lesdites paroles plus de trois mille fois. Lesquelles si un Cretien par imprudence, ou autrement, auoit proferees en leur pais, & il fust oui, il seroit contreint de se faire Turq, ou bien de mourir sans aucune merci. Tellemēt que quand i'allois par la vile du Caire, plusieurs Turqs me disoient ces paroles à haute voix, à celle fin que ie disse apres eus : mais i'estois de cela assez auerti. Les femmes n'entrent gueres en leurs Temples, à cause (ce disent ils) qu'elles sont immondes, & pourautant indignes d'y entrer : qui plus est, elles ne sortent iamais de la maison le visage descouuert, mesmes depuis qu'elles sont mariees ne frequentent ne pere ne mere. Au surplus lesdit Turqs sont
circ

ci reconcis comme les Juifs, au lieu que nous sommes bap-
 tisez. Combien qu'ils tiennent Iesuchrist pour un grand &
 excellent Profete. Ils ont ensuiuus, & de present ensuiuent
 toutes les anciennes heresies & opinions des Arriens, Sabel-
 liens, Manicheens, Donatistes, Nestoriens, Pelagiés, & autres,
 en plusieurs passages: qui nous demontre clerement leur
 loy & religion estre un comble de toutes erreurs. En ladite
 vile du Caire estoit iadis la forteresse des Rois d'Egypte: &
 encores le Bacha d'Egypte y fait la residence, & y tient
 grand' court, acompagné d'un grand nombre de Iannif-
 laires. Ce chateau fut fait anciennemét des Rois dudit pais,
 au plus beau & haut lieu, qui soit en toute la cité, tellement
 quil se voit de loin. La y ha plusieurs animaux, comme qua-
 tre Elefans, Lions, Tygres, Leopars, Scorpions, Rhinoce-
 res (qui est un animal à quatre piez, ayant une corne aus
 narines, grand ennemi de l'Elefant) Veaus marins, Cigon-
 gnes. le ne veus mettre en oubli deus Giraffes que i y ay
 vuës, qui ont le col plus grand que le Chameau, deus cor-
 nes de demi pié sur la teste, une petite au front, les deus
 iambes de deuant grandes, & hautes, & celles de derriere
 courtes, ainsi que pouuez voir en la figure suiuaute, laquelle
 ha esté representee au plus pres du naturel qu'a esté possible.
 Cette beste est le simulacre des gens doctes, & lettrez, come
 recite Policien. Car i's semblent de prime face estre
 aspres, rudes, & fachus, combien qu'a raison du sauoir qu'ils
 ont, soient beaucoup plus gracieus, humains, & asables, que
 les autres qui n'ont en rien connoissance des lettres, & ver-
 tus: ou qui seulement ont salué les Muses, comme on dit
 communement, de l'entree de la porte. Autre chose n'ay vü
 audit Caire du tens que i'y estois, qui soit digne decrire,
 fors le grand trionse que font les Turqs lors qu'ils vont à la

t Meque,